

لون السما برتقالي محمر
علي الزيدي

لون السما برتقالي محمر / يوميات

علي الزيدي كاتب مغربي

الطبعة الأولى ، ٢٠٠٩



دار اكتب للنشر والتوزيع

القاهرة ، اش المعهد الديني ، المرج

هاتف : ٠٢٢٤٤٠٥٠٤٧

موبايل : ٠١٢٩٢٥١٥٩٢ - ٠١٨٢٣٦٣٠٣٥

dar_oktoob@gawab.comE – mail :

المدير العام :

يحيى هاشم

تصميم الغلاف:

حاتم عرفة

تنسيق لغوي :

حسام مصطفى إبراهيم

رقم الإيداع : ٢٠٠٩/٧٢٣٣

I.S.B.N: ٩٧٨-٩٧٧-٦٢٩٧-٨٣-٣

جميع الحقوق محفوظة ©

لون السما برتقالي محمر

يوميات طفل مغربي بالعامية المصرية

علي الزيدي

الطبعة الأولى

٢٠٠٩



دار الكتب للنشر والتوزيع

إهداء إلى :

علي لما كان عمره خمس سنين،
وأمي وأبي طول العمر.

مقدمة

لما خلصت الرواية دي، قابلت بنت صغيرة عمرها ٣ سنين،
اسمها نورهان..

تعرفنا على بعض.. وقعدنا في البلكونة..

بقينا أصحاب.. سألتها:

- هي السما قرية ولا بعيدة؟

بصت لي، وبصت للسما وشاورت عليها وقالت لي:

- أهـه..!!

قلت لها:

- أيوه.. بس أنا عايز أعرف، هي قرية ولا بعيدة؟

بصت لي باستغراب المرة دي، وبصت للسما وشاورت

عليها ثاني وقالت لي:

- أهـه.. إنت مش شايفها..؟!

ضحكت وفهمت من حركتها وهي بتشاور على السماء،
ومن نبرة صوتها وهي بتكلمني، إنها قرية..

لأن وإحنا صغيرين لما كنا نشاور على حاجة بعيدة، كنا نغمض عيننا ونشاور عليها ونمد في صوتنا ونقول:

- هـ -

وإحنا صغيرين السما كانت قرية..

المؤلف

مع إن السما ألونها كثيرة، أزرق وأسود وأحمر ورمادي
وساعات ألوان مدرجة جميلة...إلا إن مدرستنا، مدرسة
الأزهار الابتدائي،اختارت اللون الأزرق..

- لون السماء أزرق.. وعلم بلادي جميل..

ماعرفش ليه! يمكن لأن مدير المدرسة بيعحب اللون الأزرق؟
مع إنه دائماً لابس بدلة سودا، ونظارة شمس خضراء، كان نفسي
يختاروا اللون البرتقالي المحمر.

كان عندي إحساس إني مختلف عن باقي العيال اللي في
المدرسة، على شان كده قررت وفجأة.. أغتير من تسريحة
شعري وأسرحه لورا زي "ترافولتا"، بخلاف كل العيال اللي
تسريحتهم كانت على جنب، يومها العيال اللي في المدرسة
اتريقوا عليا وضحكوا كثير، ومع ذلك قررت ما اتراجعش في
تسريحة شعري، بعدها بفترة بدءوا العيال اللي في المدرسة
يسرحوا شعرهم لورا زيي..حتى المدرسين والناس اللي في
الشارع، ساعتها حسيت إني ممكن أغتير حاجات كثيرة.

خديجة المصلوحي..

دي المدرّسة بتاعتي في التحضيري، سقطتني أول سنة، لأنها
افتكرت إني غشيت من "توتاوا"،

مع إن "توتاوا" هو اللي غش مني..سألتنّا:

- مين اللي غش من الثاني؟

أنا سكت على شان مارضتش أكسف "توتاوا"، لكن
"توتاوا" طلع أنصح مني، رفع إيدّه وقال لها:

- هو يا أستاذة اللي غش مني.

ساعتها حبيت أتكلم، لكن الأستاذة خديجة نهرتني وقالت
لي:

- اخرس.. ماتنطقش ولا كلمة..

حسيت بإحساس كده.. الحقيقة اتكرر معايا كثير بعد
كده.. عرفت بعدين إن اسمه الإحساس بالظلم..كان أول مرة
أعرف إن ثمن الجدعة.. إني أسقط وأعيد السنة!!

ولما عدت السنة، حظوني في فصل جديد ماعرفهوش، مع
أستاذة جديدة هي كمان ماعرفتهاش، رحّت لأمي وعيظت،
وقلت لها:

- أنا عايز أرجع للفصل بتاعي مع المُدرّسة بتاعي خديجة.

أمي راحت معايا المدرسة واعتذرت للمدرسة الجديدة، وطلبت من الأستاذة خديجة ترجعني معاها ثاني، الأستاذة خديجة خدتني من إيدي ورحنا على الفصل الأولاني، الفصل اللي حيطانه مش غريبة عليا، وسبورتة.. أعرفها كويس، والكرسي بتاعي اللي لسه مستيني، وشبابيكة اللي بتطل على النخلة الكبيرة اللي مليانة رطب، اللي نفسي أعرف سكتها منين.

الأستاذة خديجة بقت فرحانة بيا، افكرت.. إني ماقدرتش على فراقها، وأنا الحقيقة ماقدرتش على فراق الفصل بتاعي، بقت هي تعاملني كويس، وأنا في الثلاث دورات أطلع الأول. في السنة دي، حصل حاجتين مهمتين..

الحاجة الأولى: إن الأستاذ خديجة كانت عايزة تشتري عربية بابا الأورنج الصغيرة، لكن بابا ماكنش عايز يبيع العربية، فبعث معايا أخويا الكبير رشدي للمدرسة، على شان يعتذر لها. قابلتهم ببعض، وعرفتهم على بعض:

- أخويا رشدي... المُدرّسة بتاعي خديجة...

تشرفنا.

سلموا على بعض، سبتهم ودخلت على الفصل بتاعي
وقعدت، وفضلوا هما واقفين عند باب الفصل بيكلموا كثير،
منسجمين مع بعض، مبتسمين، حسيت إنهم ممكن يلعبوا
عريس وعروسة.

الحاجة الثانية: حصل، إن ولد من الولاد الصبيغ اللي في
المدرسة، وكان أكبر مني، شرط المريلة بتاعي وقطعها لي
بموسى حلاقة، اشتكيت للمدرسة بتاعي خديجة، وكان يومها
السما بتمطر جامد، مسكتني من إيدي، وطلعنا من الفصل
بنجري تحت المطرة الغزيرة، وهي بتداريني بإيديها الثانية على
شان تحميني من المطرة وبتقولي:

— خليك لازق فيا.

حسيت بخيتها، وإني اتصرفت صح لما طلبت من ماما
ترجعني الفصل عندها، فضلنا نجري لغاية ما دخلنا الفصل اللي
فيه الولد الصايغ، كان نفسي نفضل نجري ونجري... أكثر من
كده..

شاورت لها على الولد، فندهت له هي والأستاذ بتاعه،
وبخووه.. وقالت لي:

- احكم بنفسك، عايز نعمل فيه إيه.

قلت لها:

-أنا مسامحه!!

قالت له هي:

- شفت، إنه طلع أحسن منك إزاي، وسامحك، لسو ما
كنش سامحك بنفسه، كنت هركب لك ودين حمار، وأنفك
المدرسة كلها.

الحقيقة بعدما سامتته، وريته لأخويا زكريا اللي أكبر مني،
مسكه بره المدرسة، وإدى له علقسة ماوصلتش!! ودول
الحاجتين المهمين اللي حصلوا، وخلوا علاقتنا أنا والأستاذة
خديجة تتوطد، وننسى اللي فات، ونفتح صفحة جديدة.

صحيان الصبح بدري على شان المدرسة، كان بيبقى شيء
مزعج جدًا، كانت أمي بتصحيني فأتراجها إنها تسبني كمان
شوية صغيرين، ماكنتش بترضى، كانت تقول لي:

- يلا على شان الوقت فاتك..الساعة بقت ٧:٣٠.

أصحي وأقوم، أبص للساعة الكبيرة اللي متعلقة على الحيطه
في وسط الدار، ألاقى العقرب الصغير عند ٧ والكبير عند ١٢
يعني لسه الساعة ماوصلتش ٧:٣٠، كانت تقولي:

- ٧ و ٧:٣٠ زي بعض.

ماكتش بصدق، لكن مابقشهاش على شان هي ماما، لو
كانت ٧ زي ٧:٣٠ أكيد ماكانش هحتاج ساعة في البيت
خالص!!

الجو كان يبقى ساقع، والمياه كمان ساقعة، أغسل وجهي،
وأقعد عند الفطار وإيديا ما بين رجلي بسخنهم، وأمي هسي
اللي بتاكلني بإيديها.

تلبسني المريلة البيضاء، وتسرحلي شعري، وتشيلني شنطة
المدرسة، وتقولي:

- يلا على شان ما تتأخرش على المدرسة.

أبص في المراية، وأطمئن على تسريحة شعري، وأمشي.

وبره كانوا العيال اللي قدي، بيتقو ماشين مع مامتهم
لابسين المرايل البيضاء، ومامتهم هي اللي شايطة شنطة المدرسة،
إنما أنا خلاص، بقيت أعرف أمشي لوحدي.

كنت بحب أبص للسما وأنا ماشي.. كل الناس بتقول إن
السما بعيدة، لكن أنا شايفها قريبة، أمد إيدي للسما وأبص
عليها، وأقول في حس بالي:

- لو أطول بس شوية كمان،

همسك السما بإيدي.

الجمعة والأحد إجازة، كنت بوصي أمي تصحيني بسدري
زي الأيام العادية، على شان أحس بحلاوة طعم النوم، وأرجع
أنام تاني، لكن الظاهر إن طعم النوم مايبقاش حلو إلا في أيام
المدرسة، إنما الإجازات أصحى وماعرفش أنام تاني، أفطر
وأخرج بره نلعب أنا و أولاد "عمي احمد"، "ياسين" و "نوفل".

ومرة وإحنا بنلعب، "نوفل" مسك صفيحة بويصة فاضية
قديمية، وقال لنا:

- أنا هعمل عكسري.

قصده عكسري، لبس الصفيحة على راسه، فدخلت راسه
جوا الصفيحة واتحشرت، حاولنا -أنا وياسين- نطلعها، بس
ماعرفناش، كان بيصرخ من جوا الصفيحة، ويقول:

- اندهولي ماما، أنا عايز ماما.

ندهنا على مرات عمي احمد، فجأت مخضوضة! قعدت
تصوت، فالعائلة اتلمت كلها، بقت عمي "راضية" ماسكة

"نوفل"، وعمتي "رحمة" تشد الصفيحة من راسه، و"نوفل"
يصرخ جوا، ومامته تبكي وتقولهم:

- بالراحة عليه على شان

مايتخنقش...!!

لغاية لما عممي "جميلة" قالت لأخويا "زكريا"، يروح يجيب
أقرب حداد عندنا في الحتة، جه الحداد..

وقعد يضرب على الصفيحة بالمسمار والشاكوش، و"نوفل"
يصرخ، ومامته تبكي وتقول:

- ابني هيروح مني.

وأخيراً الحداد عرف يخرج راس "نوفل" من جوا الصفيحة،
وأمه حضنته، وقعدو هما الاثنين ييكوا، وإحنا كلنا بنضحك،
"نوفل" بعد كده، بقى لما يحب يلعب عسكري، يحط على
راسه علب البلاستيك بدل الصفيح، على شان لو راسه
اتحشرت، نعرف نطلعه من غير ما نجيب الحداد.

"رضا" ابن خالي، كان كل سنة يحتفل بعيد ميلاده، وكانت
مامته.. مرأة خالي يعني، تعزم إخوانها وتعزمننا كلنا، كانت

شاطرة قوي، بتعمل التورنة بإيديها، وكنا كلنا نجيب هدايا
لـ"رضا".

فاكر مرة رحت مع أمي لعيد ميلاده، شيلتني الهدية، اديتها
لـ"رضا" وأنا مفروس منه..

- كل دي هدايا؟!!

سألت أمي:

- هو أنا مابحتفلش بعيد ميلادي ليه، اشمعني رضا؟

قالت لي:

- رضا هو الوحيد اللي عند أمه، إنما أنا عندي ثمانية
وبعدين أنا مابعرفش أعمل تور.

كانت تخلي مرآة خالي توريها إزاي بتعمل التور..زي لما
كانت في كل رمضان تيجي لنا ويعملوا "الشباكية" سواء، لكن
الظاهر إن شباكية رمضان، أهم من تورنة عيد الميلاد.

كنت بحب رمضان قوي، وبعرف إنه قرب، أول لما نبتدي
ندهن البيت من جوا، وابتدي أشم ريحة البويه، على شان
رمضان البيت يدهن من جوا، وعلى شان العيد الكبير البيت
يدهن من بره، وفي رمضان البيت يتملي حلويات، شباكية
وبقلاوة وبغريز وحريرة وعصاير وطواجن وأكل أشكال

وأنواع، لكن يبقى زعلان لأن أمي ما بتسبنيش أقعد معاهم
على الفطار، بتقول:

-الصائمين بس هم اللي بيقدوا على السفرة.

على شان كده أخويا زكريا كان بيصوم.

حببت رمضان على شان الشباكية والسحور، وحببت العيد
الصغير على شان الهدوم الجديدة وفلوس العيدية، وعشوراء
على شان القشاوش (يعني اللعب)، والكحل اللي كانت بتحطه
لنا جدتي "هلالية" في عيننا، بس العيد الكبير ما جتتهوش
خالص.. لأن الحرفان بعد لما أأكلها وأصاحبها، وناخذ علسي
بعض ونلعب سوا، بتدبح!! ذنبها إيه؟

لما نجحت في التحضيري، وطلعت سنة أولى ابتدائي، الفصل
اختلف عليا تمامًا، لكن حاجة واحدة خلّتي أحبه من أول يوم،
إن شبايكه لسه بتطل على النخلة الكبيرة اللي مليانة رطب.

أول يوم، اتعرفنا فيه على المدرس الجديد، كان اسمه الأستاذ
"الشوري" .. إسم على مسمى، لأنه زي الشرابات، عسل،
بيضحك ويهزر معانا، ويحكّي لنا نكت، بقينا نروح المدرسة
كأننا طالعين رحلة، ولو غاب، بتزعل وتتضايق.

في أول يوم، طلب منا أدوات المدرسة، القرآن يتغلف بالأصفر، والتلاوة باللون الأزرق، وكراسة الإملاء بالأحمر، وكراسة الحساب بالرمادي، وقلم أزرق وقلم أسود وقلم أحمر وأخضر، وسبورة... وإلخ إلخ إلخ.

شنت المدرسة ثقلت صحيح، لكن الألوان الكثيرة اللي فيها خلتنى مبسوط بها.

لما كان الصيف يقرب والجو يبقى حر، الأستاذ "الشوري" كان بيعت "يحيى" ابن حارس المدرسة يجيب لنا المياه الساقعة من الشلابة، لأن بيتهم كان جوا المدرسة.

"يحيى" كان محظوظ، كان آخر واحد يستعد على شان يروح المدرسة، لأنه ساكن جوا المدرسة، وأول واحد يوصل بيتهم لما بنخرج من المدرسة، وإحنا كنا محظوظين لأنه كان معانا في الصف، لو احتجنا أي حاجة مش موجودة في الفصل، الأستاذ "الشوري" كان بيعته يجيبها لنا من البيت.

أبو "يحيى" حارس المدرسة كان صعب جدًا، يفتح الباب بميعاد، ويقفله بميعاد، ولو حد فينا اتأخر ماييسمحلوهوش يدخل، لكن لو حد من المدرسين جه متأخر، يفتح له الباب على طول، مرة وصلت متأخر وهو يقفل الباب، مارضيش يدخلني، قتلته:

- لو يجي ابنك كان ساكن بره المدرسة

واتأخر، كنت هتعمل معاه كده؟

قال لي:

- نعم..آه..هعمل معاه كده.

وسايني ومشى.

الأستاذ "الشوري" .. كانت له طريقة في التسميع، مختلفة
عن كل المدرسين اللي عرفتهم بعد كده، ماكانش بيسمع لنا
واحد واحد، كان يقول لنا:

- اللي حافظ يقوم يقف عند السبورة!

نقف صف واحد، ونسمع كلنا مع بعض في صوت واحد
ولحن واحد زي الكورال، واللي مش حافظ كان بيحرك بقبه
ويتدارى وسطينا، لكن الأستاذ "الشوري" كان بيطلع من
وسطينا ويقول له:

- سمع لوحذك يا شاطر.

يتكسف الولد ويعترف إنه مش حافظ، الأستاذ الشوري

يقول له:

- اوقف هناك وإدي وجهك للحيطه،

وارفع رجل من على الأرض!

في السنة دي، اللي هي سنة اولى، صاحبي "المهدي زرقيق"،
اللي كان بيقد جني على نفس الدكة، تعب.

أبوه أخذ له إذن من المدرسة بالغياب، والأستاذ "الشوري"
كلفني أروح له البيت وأخليه ينقل الدروس اللي فاتته، أخذت
العنوان من أبوه، وخليت بابا يوصلني بالعربية.

"المهدي" كان ساكن في عمارة، مش بيت مستقل زينا،
فتح لي الباب بنفسه، ولقيت وجهه كله منقط أزرق، حبوب
طلعت في جسمه، والدكتور طلع له دواء يشربه، ودواء أزرق
يتحط على الحبوب دي، مامته رحبت بيا وهو بقى مبسوط إني
بزوره في شقتهم.

كانت شقتهم مختلفة خالص عن بيتنا، كان ليها ريحة زي
ريحة الزبدة، والأثاث أجني، والأنوار كلها مطفية، ماعدا
الغرفة اللي كنا قاعدين فيها، وماتسمعش فيها حس خالص،
"المهدي" ماكنش له إخوان، خليته ينقل الدروس اللي فاتته،
وأنا مروّح، خدت منه كراسته على شان أنقل له الدروس اللي
مالحقش ينقلها، بقيت مبسوط إني بساعد صديق ليا، بنقعد أنا

وهو جنب بعض على نفس الدكة، وهو بقى سعيد ومطمئن
لأنه أول ما احتاج لصديق لقاني جنبه.

صحيح إني دخلت المدرسة الحكومي زبي زي أي طفل حر
شريف، لكن اللي علمتني القراءة والكتابة والحساب يجد، هي
أمي، مش المدرسة، على شان كده كنت شاطر لحد سنة ثالثة،
لأن أمي كان معاها الابتدائية بس.

وفي سنة ثالثة، قابلت "توتاوا"، لأنه سقط وأنا نجحت،
فاتقابلنا من ثاني في فصل واحد، وفي الاستراحة قلت له:

- فاكّر في التحضيري لما غشيت مي

وسألنا الأستاذة حديجة.. فقلت إنت إني أنا

اللي غشيت منك؟

قال لي:

-آه.. إنت اللي غشيت مي وأنا ما بكذبش.

ماقدرتش أمسك نفسي، ضربته بُنية وروسية ووقعته على
الأرض، وغمّت فوقيه وبقيت أضرب فيه، أضرب.. "توتاوا"
أيامها كان من العيال الصيع اللي بتعرف تتحانق وتثبت، لكن

أنا ماكنش هاممني، كنت حاسس إني باخد حقي بإيدي، العيال
في المدرسة بعد الحنافة دي، بقوا يعملوا لي حساب.. ويقولوا
إن "علي الزيدي" يلعب كراتيه.

في السنة دي بالذات، اللي هي سنة الثالثة، اتعرفت على
التميمي" واتصاحبت عليه، ولد غلبان قوي وأبوه راجل فقير،
ساكن في مكان بعيد عن المدرسة خالص، جنب الوادي.. اسمه
(وادي المحنش)، كانت ظروفه صعبة كثير، صحيح أنا ماشفتش
بيتهم، لكن كان باين من جزمته المتقطعة وهدومه المهلهلة
وكتب المدرسة القديمة اللي بيشلها في شنطة الكيس، بدل
شنطة المدرسة زينا، ومع ذلك كان ولد بكرامته وشجاع
كمان.. وده اللي عجبي فيه، على شان كده، بقينا أصحاب
جدا، وهو كمان قال لي إنه بقى معجب بيا ونفسه يصاحبني
من اليوم اللي ضربت فيه "توتاوا".

حكيت لأمي عن صاحبي الجديد "التميمي" وعن ظروفه،
قالت لي:

- ابقى خليه يجي معاك تفطروا

سوا وتنغدوا، لكن أمه تبقى عارفة

على شان ماتقلقش عليه.

"التميمي" بقى يعدي عليا الصبح قبل المدرسة، يفطر معايا ونروح المدرسة سوا، كان بيقول إن فطارنا بيعجبه قوي، مع إن فطارنا كان عادي جدا، خبز مشوية متحمرة مع زيت زيتون، وقهوة بالحليب.

"رضا" ابن خالي.. كان أكبر مني بسنة، لكن أطول مني بثلاث سنين...

على شان كده الهدوم اللي بتصغر عليه، مراة خالي كانت بتغسلها وبتحط لها المعطر الخاص بالهدوم، وتكويها وتطبقها، وتديها لأمي، على شان تلبسها لي. أمي كانت دايما تقول لي:

- بص دي كأنها جديدة.. كأنها ماتلبستش خالص.

أنا كنت ببقى مبسوط بيها، مش على شان جديدة والكلام ده.. ما أنا عارف إنها "سكند هاند"، أنا كنت ببقى مبسوط على شان ريحة المعطر اللي بتفوح، اللي مراة خالي حطاه في الهدوم.

أمي ما كنتش بتعرف تعمل الحركات دي ليه، وكمان ما كنتش بتسألني، زي ما مراة خالي كانت بتسأل "رضا" كل ما أبات معاه:

- تحب تتغدى إيه النهارده يا رضا..؟

لو سألت أمي.. هتقول نفس الجملة:

- مرارة خالك عندها ولد واحد، إنما أنا عندي ثمانية.

كانت بتيجي أيام في الشتاء، السماء بتقعد كثير
ما بتطرش.. الناس والجيران في حثتنا كانوا بيخرجونا إحنا
الأطفال أولاً، ويعلمونا إزاي نطلب الغيث ثانياً، كانوا بيقلولوا
إن ربنا بيسمع كلام الأطفال لأنهم زي الملائكة، كان أول مرة
أبتدي أسمع كلام عن ربنا وعن الملائكة بتوعه، كنا بنقول
وإحنا بنطلب الغيث في صوت واحد ولحن واحد:

- غيثك غيثك يا الله، والشتاء إن شاء الله

والسبولة عطشانة، الله يسقيها مولانا

والزروع وصل حده، الله يسقيها من خلقه

وا شتاء تا تا تا والعينين دالحراتا.....

وفعلاً كانت المطرة بتزل علينا، كنا بنفرح ونجري على
بيوتنا.. والبنات كانت تزغرد.

وفي يوم.. وإحنا في المدرسة، السما مطرت جامد، كان
لازم صاحي "التميمي" يروح معايا البيت، أولاً: على شان بيتنا

كان قريب من المدرسة، وثانيًا: على شان (وادي المحنش) بيفيض، وبكده هيقى صعب على صاحبي "التميمي" إنه يعدي الوادي و يوصل لبيتهم. فضلت طول فترة الابتدائي باستخدام أولاً وثانيًا بس، لغاية لما وصلت الإعدادي عرفت إنى كان ممكن أستخدم ثالثًا ورابعًا وخامسًا... لكن للأسف ماحدث نهني!!

المهم يومها، أمي بعد ما حطت لنا الأكل أنا وصاحبي "التميمي"، ندهت لي، وطلعت من الدولاب حاجات من هدمومي، كان فيها حاجات من هدموم أخويا "زكريا"، وحاجات من هدموم "رضا" ابن خالي، لكن من غير المعطر، وقالت لي إنى ممكن أديها لصاحبي "التميمي"، فرحت جدًا، وصاحبي "التميمي" بقى مبسوط قوي بالهدوم، قلت له في حس بالي:

- أومال لو كانت بريحة المعطر، كنت عملت إيه؟

مرة وأنا في ثالثة ابتدائي، أمي جابت لي بدلة صغرت على "رضا"، لوها بني فاتح، قستها فحت على قدي بالظبط، رحت بيها الساعات الإضافي اللي بتديها لنا مدرّسة الفرنسية "لطيفة"، على شان تشوفني بالبدلة، كنت معجب بيها جدًا!!

مش قصدي على البدلة، قصدي على المدرّسة بتاعتي "لطيفة"،
كان عندها شعر أسود مسبب طويل لغاية النص كده..
حاولت كثير أوصلها حقيقة مشاعري ناحيتها، لكن هي
كانت على طول مش واخدة بالها، أو حاسة.. بس إيه..
مطنشة.

لغاية لما مرة شفت خطيبها، كان جاي ياخدها من
الساعات الإضافي، كرهته من أول نظرة، كان يشاور لها من
بره الفصل إنه مستنيها لما تخلص. بصتله هي بعينها إنه.. تمام!
ورجعت بصت لينا ثاني على شان تكمل الدرس، طلبت مني
أكرر الكلام وراها، بصيت في عينها وسكت..!! وقتلتها في
حسن بالي:

- د أنا أحلى منه بكثير، إنتي إيه اللي عاجبك فيه؟

من يومها، قررت إني أكم مشاعري جوايا، واخترت إني
أحبها من بعيد.. حب من طرف واحد زي ما بنسميه النهارده.
ومرة وإحنا طالعين من المدرسة في الصف، صاحي
التميمي "قال لي:

- شفت النهاردة المدرسة لطيفة كانت لابسة إزاي؟

دي زي لهطة القشطة..

ما استحملتش الكلمة، وطح بالقلم على وجهه.
كانت أول مرة إيدي تتمد على أعز صديق ليا، لكن مش أول
مرة اثنين رجالة يخسروا بعض على شان واحدة ست.

"التميمي" أخذ القلم من هنا وبص لي بحرقه وقال لي:

- إيه ده يا علي!! إنت بتضربني بالقلم؟

قلت له:

- ما إنت اللي غلطت في المدرّسة بتاعتنا، المفروض إننا
نحترمها، مش نكلم عنها وحش.

الولد بصراحة طلع جدع وماردش عليا، عمل حساب
للعشرة والعيش والملح، فضلنا متخاصمين ثلاثة أيام، وفي اليوم
الرابع رحت له وطلبت منه إنه يسامحني، قلت له:

- غصب عني.. مش عارف إزاي عملت كده؟!

قال لي:

- أنا عارف إزاي عملت كده، إنت غيرت عليها،

إنت بتحب المدرّسة لطيفة يا علي.

سكت وماعرفتش أجاب...!! قلت له:

- يا ريت يفضل الموضوع ده سر بيننا.

ولغاية النهارده، ما حدش يعرف إني حيت مدرسة
الفرنساوي "لطيفة" في سنة ثالثة ابتدائي، غير أنا وصاحبي
"التميمي"، وحضراتكم طبعاً، لكن لما حيت "جيمي القويبة"
اللي كانت بتيجي في المسلسل التلفزيوني أيامها، الحقة كلها
عرفت!! أخويا "زكريا" فضحني في الحقة كلها، بقيت
مكسوف.. بقيت في نص هدومي.

مش عارف ليه لما بنحب بنخي؟! ولما الناس تعرف
نتكسف!! هو الحب حاجة غلط؟

في اليوم ده طلبت الأستاذة "لطيفة" منا نحفظ "ان بوم"
بالفرنساوي (محفوظات يعني)، قعدت طول الليل أحاول
أحفظ، إن المحفوظة تدخل دماغى، مافيش، لدرجة إني بقيت
بمحفظ وأنا بيعيط..

أبويا أخذ باله، سألني:

- مالك يا علي يا ابني؟

قلت له:

-المحفوظة مش عايزة تتحفظ.

أخديني من إيدي ودخلني غرفته وقال لي:

- هنا هتعرف تركز وهتحفظ بعيد عن الدوشة اللي بره.

قفل عليا الباب، وقعدت أحفظ مرة واثنين وثلاثة، لكن من غير أي فائدة، بكيت وصوتت وضربت بإيدي علي الأرض..دخل أبويا ثاني وقال لي:

- خلاص من غير عياط، أنا بُكره هخلي أخوك رشدي يروح معاك، ويقول للمُدْرسة إنك حاولت تحفظ بس محتاج وقت كمان.

صوت أكثر وقلت له:

- لأ!! رشدي لا...!! أنا لازم أحفظ الليلة..

أبويا مش حاسس بيا، مش عارف إني باحفظ على شان خاطر الأستاذة "لطيفة"، على شان بحب الأستاذة "لطيفة"، ولازم هي كمان تحبني، وبعدين لا يمكن أوافق إن أخويا رشدي، يقابل المُدرسة بتاعي "لطيفة".

والصبح لما سمعت الأستاذة "لطيفة" المحفوظة من العيال، كلهم كانوا يتلجلجوا، ولما الدور جه عليا سمعتها لها زي المياه..!! كان أول مرة أشوف نظرة إعجاب في عينيها، وإها كان هاتين عليها تاخدي بالحضن وتبوسني، لولا إنها مخطوبة، كل ده كان باين في عينيها، وإها كمان مش مبسوطة مع خطيها، لكن مضطرة تستحمله على شان أهلها ضاغلين عليها، سمعت صوتها جوا بيقول لي:

- ماعلش يا علي، ماعلش يا حبيبي، غصب عني.

وفجأة قالت لي بعلو صوفها:

- هاييل يا علي برافو عليك tres bien ali bravo

أمي كانت ست بيت بجد، بتطبخ وتغسل وتمسح وتكوي،
وكمان تروح سوق "سنية الرمل" تشتري خضار، كانت
بتأخذني معاها على شان أساعدها في الشيلة، كان بيبقى يوم
ثقل وغلس، لولا إني باخذ منها واحد درهم كل مرة أروح
معاها السوق، اللي كان بيخنقني مش الشيلة الثقيلة، اللي كان
بيخنقني بجد، إن أمي كل ما تقابل واحدة من صاحباتها في
"سنية الرمل"، يقفوا يتكلموا ويسلموا ويحكوا بالساعات، مش
واخدين بالهم إن فيه بني آدم محترم، واقف مستني بيتحرق تحت
الشمس.

وكل أسبوعين، كانت أمي عندها يوم اسمه "يوم التخميل"،
البيت كله بيتقلب ويتمسح ويتنصف من كل ركن وكل حنة
صغيرة فيه، اليوم ده.. كان بيبقى ممتع بالنسبة لي، لأنني
بكتشف أماكن جديدة ممكن أختفي فيها.. مش عارف ليه
كنت بحب أختفي أكثر من إني أظهر؟

"عشوشة" هي الست اللي بتساعد أمي في شغل البيت،
بتبات عندنا، ولها بنت أصغر مني اسمها "سنا" .. بكرها كره
العمى..!! وبضرها على طول بسبب أو من غير سبب، من
غير ما أعرف ليه، ما كنتش أطيق أشوف سحتها.

وفي مرة، وفي يوم التخميل، والبيت مقلوب، كنت بلعب
بلعبة في إيدي، كانت قطعة خضرة ماسكة كرة حمرة صغيرة
بين إيديها.. لما كبرت شوية، عرفت إنهم كانوا قاصدين بالكرة
الحمرة، شلة صوف، بس ما كنتش باين خالص إننا شلة
صوف!!

"سنا" بنت "عشوشة" كانت قاعدة عند الشباك الكبير
اللي بيطل على شجرة التين الخضرة الكبيرة اللي في الجنيبة،
شجرة التين اللي خطفت مني في يوم من الأيام، فردة جزمي
الصغيرة زمان، اللي كنت بحبها وكنت مسميها "بجيك"، حد
رمى البجيك بتاعي من فوق السطح، ووقعت على الشجرة من
فوق، وما حدش عرف يوصل لها ويرجعها لي ثاني، كانت لما
بتوحشني، أقعد عند الشباك الكبير اللي بيطل على الشجرة
الخضرة، وأبص عليها وأقول لها في حس بالي:

- بجيك..!! حبيبي..تعال..

كنت مستني أي حد يطلع الشجرة على شان يجيها لي،
لغاية ما جه يوم بصيت على الشجرة، مالتش البجيك بتاعي!!
يومها عرفت إن ماكتش المفروض أستني أي حد، وإن أنا اللي
كان لازم أطلع الشجرة الخضرة الكبيرة بنفسي، وأجيب
البجيك بتاعي.. أكيد ماكتش هقدر، بس كان لازم أحاول.

يومها من غير سبب، حسيت إني عايز ألعب مع "سناء"
بنت "عشوشة"، وإني مش عايز أضربها، قربت منها واديتها
لعبتي، القطة الخضرة اللي ماسكة شلة الصوف، واديتها إشارة
مني إن إحنا ممكن نلعب سوا، أمها وأمي لاحظوا ده،
وفرخوا.. أمي قالت لي:

- أيوه كده يا علي يا ابني، خليك كويس واطلعوا فوق
السطح.. العبوا سوا، لكن اوعى تضربها، دي زي اختك
الصغيرة.

ماحييتش فكرة إنها زي أختي الصغيرة، لكن حبيت فكرة
فوق السطح، طلعا السطح أنا و"سناء" بنت "عشوشة"
ودخلنا غرفة "طارق" و"سمير"، إخواني اللي أكبر مني، إخواني
الاثنين اللي طول اليوم متخانقين، وفي الليل ينامو في نفس
الغرفة وعلى نفس السرير، قفلت الباب علينا وقعدنا أنا
و"سناء" بنت "عشوشة" على السرير، حسيت إني عايز
أبوسها، حضنتها وبقيت ببوس فيها، وأحضن وأبوس، لكن

كنت حاسس إن فيه حاجة ثانية غير البوس عايز أعملها، بس
مش عارف هي إيه!!

بقيت أبص لها وأقول لها:

- اعمل فيكي إيه.. قولي لي أعمل فيكي إيه؟

كانت هي ما بتقولش حاجة غير إنها بصالي، أرجع تاني
أبوسها وأحضن، لكن أكيد فيه حاجة ثانية غير البوس ممكن
أعملها.. بس هي إيه؟... مش عارف!

وفجأة سمعت صوت "سمير" أخويا بينادي عليا، اتخضيت
وماقتش عارف أعمل إيه، سمير أخويا كان بيبقى عايزني على
شان نلعب مع ولاد الحقة في الجنان بتاعنا، أرض كبيرة كلها
شجر وغرس حوالين البيت كان اسمها "چنان دودوح" على
اسم جدي.

فتح "سمير" علينا الباب، ولقاني مخضوض، ومربوك.. مش
عارف أنطق، قال لي:

-آه....!! إنت كنت بتعمل حاجة غلط! إنت كنت
بتبوسها.

يومها اترجيته إنه ميحبش سيرة لأمي.. وافق، لكن بشرط
إنه ياخذ مني مصروفي ٣٠ سنتي اللي بناخدوها كل يوم
من "الحساني" المحاسب.. اللي عندنا في المحل.

جدي "دودوح"، كان عامل لنا مصروف ٣٠ سنتي كل يوم، ناخذها من "الحساني" المحاسب اللي بيشتغل عندنا في المحل، محل التخزين اللي بنخزن فيه قنينات الغاز، اللي عمي "المحمد"، يجيها بعريية النقل الكبيرة الصفراء، من الشركة الرئيسية في مدينة طنجة، شركة "كونبين غاز"، والعرييات الزرقا بتاعتنا، توزعها بعد كده، على كل المحلات في المدينة بتاعتنا "تطوان"، وكمات موتوسكل بثلاث عجلات، اللي "بوعزة" بيشتغل عليه ويوزع القنينات في الحواري الضيقة، اللي العرييات الكبيرة ماتعرفش تدخلها.

كان كل يوم نقف طابور أنا وإخواني، وولاد عمي "المحمد"، "ياسين" و"نوفل"، ناخذ ٣٠ سنتي من "الحساني" المحاسب ونطير على عمو "قروعة" نشترى منه حلويات "سبنة".

بعد حكاية بنت "عشوشة"، "سمير" أخويا بقى يقف في الطابور بعدي على طول، آخذ أنا ٣٠ سنتي من هنا وألف وأديها له من هنا، على شان أستر فضيحتي.

وفي يوم عملنا اجتماع مع جدي "دودوح"، على شان يزود لنا المصروف، وافق على طول وزوده ١٠٠%، بقى

مصرفونا اليومي ٦٠ سنتي بدل ٣٠، فرحت بالعلامة، وقلت
لسمير:

- إنت تاخذ ٣٠ وتخليلي ٣٠..

رفض وقال لي:

- أنا متفق معاك على مصرفك مهما زاد ومهما نقص.
نظام الاستبداد يعني، وافقت غصب عني، على شان أستر
الفضيحة.

وكل يوم أحد، لازم نروح الحمام (الحمام المغربي)، إخواني
الكبار بيروحوا لوحدهم، وأنا بروح مع ماما. كانوا الستات
بيبقوا جايين معاهم جرادل بلاستيك كبيرة، وفوط
وغسول.. وصابون بلدي وحنة وحاجات ثانية كثيرة، كنت
بكره الكيس (الليفة المغربي)، بتبقى خشنة على جلدي،
بتوجعني جامد، لكن أمي بتصر، وتقول لي:

- لازم نشيل الوسخ اللي على جسمك.

يوم الحمام ده كان ببقى عذاب بالنسبة لي، مش زي
إخواني "طارق" و"سمير"، بيحجوا من الحمام مبسوطين، ويحكوا

لنا على اللي عملوه في الحمام، كانوا يدهنوا الأرض صابون،
ويقعدوا يتزحلقوا على بطنهم، كنت بقول مع نفسي يا بختهم.

لغاية لما مرة أمي اخدتني معاها الحمام، حمام "الروبيو"، حمام
حتتنا "التوتة"، كان اسم حتنا على اسم شجرة التوتة، اللي في
الجنان بتاعنا "جنان دودوح".

(الجلسة) هي الست الكبيرة اللي بتبقى قاعدة بره في
الحمام تقبض الفلوس، مارضيتش تخليني أدخل جوا مع أمي،
قالت لها:

- الولد بقي كبير، بيعرف كل حاجة، ما ينفعش يدخل
معاك.

أمي قالت لها:

- يعني أرجع لغاية البيت، وأخليه هناك وأرجع ثاني؟

الولد لسه صغير مايعرفش،

إنتي بس اللي متها لك.

وكلمة من هنا وكلمة من هناك، (الجلسة) وافقت أخيراً،
وقالت لأمي:

- المرة دي هوافق، لكن المرة الجاية مش هخليه يدخل
معاكي.

ودخلت مع أمي جوا، وسببتها في الأوضة بتاعتها
بتستحمي، ورحت أتفسح في الحمام، والستات تصرخ وتقول:

- تبع مين الولد ده؟ حد يطلعه بره.

لغاية لما جات أمي، وأخذتني معاها أوضتها جوا الحمام،
وقالت لي:

- اقعد هنا وماتتحر كش.

من يومها بقيت مبسوط، لأنني بروح الحمام مع إخواني
"سمير" و"طارق"، ندهن الأرض صابون ونترحلق على بطتنا.

لو سألتني عن الرعب، يبقى الأستاذة "ربيعة"، أستاذة اللغة
العربية في سنة ثانية ابتدائي، كانت ست صعبة، متشالة من
قلبها الرحمة، كانت دائماً تتأخر لكن عمرها ماتغيب.

ساحة المدرسة طوابير، والعلم بيرفرف من غير تحية، وكل
صف معاه المدرّسة أو المدرّس بتاعه بيتحركوا على فصلهم،
لغاية لما الساحة فضيت، مافيش غير صفنا واقفين مستنيين
الأستاذة "ربيعة"، نبص ناحية سور المدرسة المتخرم على شكل
مربعات على شان نتملى بطلعتها البهية، وإحنا بندعي:

- يا رب ماتيجي النهارده.

كنا نبص الأول على لون الجلابة اللي هتبقى لبسها،
الأستاذة "ربيعة"، كان عندها جلابتين بلونين، خضرة يعني
هدنة، وحمرة يعني جحيم، وغالبًا ما كانت بتظهر بالجلابة
الحمراء.

مسكت الولد "كريم" مرة، وإدت له علقه بالفلقسة، قعد
يصوت ويكي ويصرخ ويقول لنا:

- إقرؤوا لي الشهادة.. أنا بموت.

وهي عمالة تضرب، وتزود، وهو يقول:

- أشهد ألا إله إلا الله، وأشهد أن محمدًا رسول الله،
الله أكبر.. الله أكبر..

فيه عيال كانت بتضحك، لكن أنا لأ..! كنت حاسس بيه،
وقرأت له الشهادة، لأني مرة وأنا لسه في سنة أولى مع الأستاذ
"الشوري"، كنا بنلعب في الاستراحة.. العيال زقوني ووقعت
على راسي من وراء، حسيت بإحساس، كأن روحي بتطلع،
كأن حاجة باردة بتخرج من جسمي، يومها اتشهدت وقلت:

أشهد ألا إله إلا الله، وأشهد أن محمدًا رسول الله.

لكن ما متش..!!

الأستاذ "الشوري" ماكنش بيضرب، كنا بنحفظ معه ونذاكر، من غير خوف.

وفي مرة.. مع الأستاذة "ربيعة" كان عندنا حصة النشاط العلمي، طلبت منا نجيب اللمة الصغيرة خالص، مع حنت سلك وبطارية.. لكن من النوع المسطح.

لقيت اللمة ولقيت السلك، لكن مالقيتش البطارية، دوّرت عليها عند كل المحلات اللي أعرفها واللي ما أعرفهاش، لكن للأسف كل البطاريات اللي لقيتها أسطوانية، يعني ماتنفعش، الأستاذة "ربيعة" كلمتها واحدة:

- مسطحة يعني مسطحة.. ويا ويله يا ويله ويا سواد ليله، اللي يجيب لي بطارية أسطوانية.

ده كان كلامها في الفصل.

_ صدقني الأسطوانية مش هتحل المشكلة، بل بالعكس هتزيد من حجم المشكلة.

_ إحنا يهمننا إن اللمة الصغيرة تنور، وسواء أسطوانية أو مسطحة.. اللمة هتنور. حتى شوف.. اهوه، نورت!!

_ يمكن والله أعلم إن التسجيل اللي عندها في البيت، مايشغلش إلا على البطارية المسطحة.

وده كان كلامي مع عم "قروعة" وهو بيحاول يقنعني إني
أشتري منه البطارية الأسطوانية، وهو بيجرها لي.

كنا زي العادة واقفين في الصف مستنيين طلعتها البهية،
كنت برتعش، النهارده هاكل علقه ماحصلتش على شان
البطارية المسطحة، ريحة الثوم معبقة الجو، العيال كانوا بيدهنوا
الثوم في إيديهم ورجليهم على شان يستحملوا الوجع، يقولوا
إن الثوم بيخليهم مايحسوش بالضرب، يعني من الآخر النهارده
مجزرة.

وفجأة ظهر أخويا "زكريا"، خارج في الصف مع أصحابه
مروحين، كان ساعتها في سنة رابعة، وكانوا بيخلصوا
حصصهم قبلنا، ندهت عليه، وفهمته إني واقع في مشكلة، وإنه
لازم يتصرف ويحسب لي البطارية المسطحة، أخويا "زكريا" أخذ
مني الفلوس حق البطارية، وجري زي البطل، عمري ماشفت
أخويا "زكريا" بيجري بالسرعة اللي جري بيها يومها،
وفضلت في الصف مستني.

ببص ناحية السور المتحرم، وبشم في ريحة الثوم، وفجأة
ظهرت جلابة حمرا بتمشي على كعب عالي!! كانت الأستاذة
"ربيعة".. قلبي اتخطف.. ووجهي اصفر.. وحسيت إن هلايتي
قربت، الصورة بقت سودا.. مش باين فيها غير الأستاذة

"ربيعة" جاية عليا، وعنيها بتطق شرار، والجلابة الحمرا مولعة نار، لولا إن البطل ظهر ثاني في الصورة، كان بيحجري ويجري.. لغاية ما وصل، وناولني البطارية المسطحة وقال لي:

- وصلت لغاية "باب العقلة".

ومشي ثاني قبل ما الأستاذة "ربيعة" تلاحظ. صحيح إن "باب العقلة" النهارده قرية من مدرسة الأزهار، لكن أيامها كانت بعيدة جدًا، أنا كنت عارف إن أخويا "زكريا" بطل، لكن ما كنتش أعرف إنه بيحبي كده وبيخاف عليا.

عم "قروعة" كان دائمًا ينام في المحل وهو قاعد، كانوا العيال يشتروا منه البمب ويرموه عليه جوا المحل، والبمب يفرقع.. فيتخض ويقوم يشتم، ولما يرجعوا يشتروا منه البمب ثاني، بيع لهم.. وهو متأكد إنهم هيعملوها فيه ثاني، لأن لو ما باعلهمش هيشتروه من محل ثاني، وبرضه هيرموه عليه.. وفي أوقات الصلاة كل المحلات اللي في حتنا تقفل، إلا عم "قروعة" كان بيفضل فاتح، لأنه ما كنتش بيصلي.

ولو سألتني عن الطيبة، تبقى "ربيعة" مرأة عمي "اشعيب" الأولى، اللي كانت ساكنة معاه في "جبل الحبيب"، قرية جبلية

في نواحي تطوان، هناك كانت "ربيعة" مراة عمي ممكن تعلمك
معنى الطيبة، كل اللي بتعمله إنها بتقعد منتظرانا دائماً على شان
نزورها، كانت الفرحة ما بتسعهاش وهي شيفانا نازلين من
عربية بابا، بتحضن أمي وتبوسها جامد، وتسلم علينا وتشيلني
أنا من على الأرض وتاخديني في حضنها، كانت على طول
تقول لنا:

- مرحباً بكم..

وكان عمي "اشعيب" على طول يقول لنا:

- مرحبا باللي جاء وجاب.

عمي "اشعيب" ساعتها كان موظف في قيادة جبل الحبيب،
حكومة يعني، كل أهل القرية عاملين له ألف حساب، وهو
مش عامل حساب لحد غير للقائد، الرئيس بتاعهم يعني.

عمي "اشعيب" له حوش كبير، مربى فيه بقرتين وماعز
وفراخ كثيرة، كانت "ربيعة" مراته بتدبح لنا منها، وكمال
ما بترفضليش طلب، بتملا لي طشط المياه وتحطني فيه وتسديني
خرطوم المياه على شان ألعب وأبليط.

مرة طلبت منها إنها تملا لي الطشط زي كل مرة، أمي
منعتني، رحت عملهم على روعي بالقصد، وقلت لها:

- شفني لازم أستحمي.

قامت "ربيعة" وملأت لي الطشط، وقعدتني فيه ألبط.
ومرة "ربيعة" خلقت زليطة لإخواتي كلهم، على شان الحر،
وأنا قالت لي:

- إنت شعرك حلو، حرام نخلقه زليطة.

"ربيعة" مراة عمي "اشعيب" ماكتتش بتخلف، لكن كانت
بتربي بنت صغيرة قدي اسمها "مريم"، عمي "اشعيب" على
طول يشتم البنت دي ويضرها من غير سبب، و"ربيعة"
ماقدرش تقول حاجة، كل اللي بتعمله، إنها تطبطب على
البنت وتقول لها:

- بس ما علش..

الغريب إن "مريم" دي مابتعيطش، وكمال مابتكلمش،
كانت بتصعب عليا، لكن مابسألش عمي "اشعيب"، إنست
بتضرها ليه؟! لأنني كمان بضرب "سنا" بنت "عشوشة" من
غير ليه، فهمت ساعتها إن لازم يبقى فيه حد إحنا نضربه.

لغاية لما بقينا نروح جبل الحبيب لكن مابنلاقش "ربيعة"،
عرفت بعدين إن عمي "اشعيب" ساب "ربيعة"، وإن "ربيعة"
راحت بس ماחדش يعرف هي فين، كان نفسي أعرف هي

راحت فين على شان أشوفها، أخي "ألطاف" قالت إنها قابلتها مرة عند "باب انوادر"، وإنها بتسلم علينا كلنا.

وأختي "سلوى" قالت إنها مرة، لما كانت لسه مع عمي "اشعيب" في جبل الحبيب، سحبتها من أيديها وهي مبسوطة، وقالت لها:

- تعالي لما أوريكي حاجة حلوة.

دخلتها غرفة النوم وفتحت الدرج وطلعت ورقة وقالت لها:

- أنا وعمك اشعيب متجوزين رسمي والعقد أهو... حتى شوفي.

لما "سلوى" أخي بصت في العقد، لقيته عقد جواز ماما وبابا، ماقدرتش تقول لها على الحقيقة، "ربيعه" مرارة عمي "اشعيب" مابتعرفش تقرا.

الرعب كان اسمه الأستاذة "ربيعه"، والطيبة كان اسمها "ربيعه" وبس.

أبويا كان مدخن درجة أولى، كان ممكن يخلص ثلاث علب سجائر في اليوم، وأمي كانت ست شيك قوي، على الموضة زي ما يقولوا، مرات كثيرة، كانوا يخرجوا يسهروا بصره،

ساعات ياخذوني معاهم، وكثير ماكنوش يرضوا.. الغريب إني كنت بسمع الكلام وبقعد مع إخواني، مع إني ببقى مبسوط في الخروج معاهم.

وفجأة حصل تغيير، أبويا بطل السجاير وابتدا يعضغ لبان، كان يقول:

- اللبان هيساعدني إني أبطل السجاير.

وابتدا كمان يلبس اللبس التقليدي المغربي، بدل البدل الشيك اللي لسه بيلبسها، جلابة غالبًا بيضا وبلغة كثير صفرا وطربوش أحمر دائمًا، وكل يوم يقرأ القرآن، وأمي بقت بتحط طرحة على راسها وتلبس جلابات وتصلي، وبابا هو اللي بيعلمها الصلاة.. ولما بتروح المناسبات مابتحطش البواريك ولا أحمر شفايف، وبعد ما يخلصوا الصلاة هي وبابا، تبوس إيده!

ابتديت أسمع في البيت كلام عن ربنا، وعرفت إن السجاير والبواريك وأحمر الشفايف، حاجات حرام، سألت أُمِّي:

- يعني إيه حرام؟

قالت لي:

- يعني ربنا مايحبش كده.

- هو مين ربنا؟

- ربنا هو اللي خلقنا.

يوم بعد يوم بقيت أعرف حاجات كثيرة عن ربنا، إنه موجود في السماء، وإن هو الذي خلقنا، وإن عنده الجنة وعنده النار، حيث ربنا على شان يديلنا كل حاجة إحنا عايزينها، بس كمان بقيت أخاف من ربنا على شان عنده النار.

مرة كنت راكب في العربية مع بابا، كان يفسحني في قلب تطوان، مدينتي اللي بقيت خلاص.. أعرفها حنة حنة وشارع شارع، حتى الوجوه مابقتش غريبة عليا، وعند شارع "محمد الخامس"، وبالظبط عند النافورة اللي بتطلع المياه بالألوان، أحمر وأخضر وأصفر، وكمان بصوت الكمان، سألت بابا:

- هي الفرقة قاعدة جوه النافورة؟!

ضحك وقال لي:

- لا، ده جهاز تسجيل، دي مزيكة "عبد الصادق شقارة".

كان دائماً عندي إحساس إن بابا عارف كل حاجة - كانت مزيكا أندلسية - ماكتش مهتم بأنواع المزيكا أيامها، لكن اللي شدي فعلاً إن جهاز التسجيل لو اتبل، أكيد هيوظ، بس أكيد اللي حاظه جوا النافورة، كان عامل حسابه، فكرت شوية وبعدين سألت بابا تاني:

- هو مين اللي خلق ربنا؟

سكت المرة دي ومن غير ما يضحك بص لي!!.. حسيت
إنه مش عارف يجاوب، كان أول مرة أحس إن بابا مش
ضروري يعرف كل حاجة، قال لي:

— إحنا خلقنا ربنا.. لكن ربنا ما حدش خلقه.

وبعدين، حرام إن إحنا نفكر مين اللي خلق ربنا.

حرام تاني!! كلمة بقيت أعرفها خلاص، يعني سحابر
وبواريك وأحمر شفايف، وفوقهم إننا مانفكرش.. مين اللي
خلق ربنا.

غرفة النوم ضلمة، وأنا نائم في سريري الصغير اللسي على
شكل قفص، وصوت أخويا "سمير" واصل لوداني، مع أصحابه
بره في الجنان بتاعنا بيطل ويغني، والليلة ليلة رمضان، وماما
وبابا على سريرهم نايمين، وماما بتقول لي:

- اسمع! أخوك سمير بيطل ويغني.

وبابا قال لها:

- سمير ده شكله هيطلع، مسحراقي.

وهما مش واحدین بالهم إن أنا عمَّال آكل فی مرتبة السفنج
بتاعتي، المرتبة اللي أنا نائم عليها، لأنی بحب السفنج، كنت
مستمع بأكل السفنج، وأنا بسمع "سمير" أخويا بيغني ويقول:

ناحلم ناحلم ناحلم ناحلم بالجلبانة

اللي قال الحب حرام يدخل لجهنمة

كانت أول أغنية أحفظها، وأتكرها كل ما يجي رمضان،
أمي وأبوي قالوا لي، إنهم لقوني الصبح نائم على الأرض، وبطني
منفوخة.. الظاهر إني أكلت كثير..أخدوني المستشفى والطبيب
قال لهم:

- لو كنتوا اتأخرتوا كمان شوية، الولد كان هيروح منكم.

مش فاكرك حكاية إني كنت هموت، ومش فاكرك حكاية
الطبيب اللي أنقذني، بس فاكرك كويس إني ليلتها كنت باكل في
السفنج بتاعي.

وفضل موضوع أكل السفنج من الهوايات المفضلة عندي،
حتى لما كبرت ودخلت الابتدائي.

فاكر يوم كنت زهقان، بلف حوالين البيت لوحدي، مش
لاقي حد ألعب معاه، "ياسين" و"نوفل" ولاد عمي، راحو مع
مامتهم، عند جدتهم "آمنة" اللي ساكنة في "الباريو"، حتة كده

بعيدة فوق خالص، وأخويا "زكريا" جوا البيت بيتغدى، وأمي
بتنده عليا على شان أكل، رديت وقلت لها:

- مش جعان.

وفجأة عند الباب الوراني اللي بيوصل لبيت جدي
"دودوح"، لقيت مرتبة سفنج كبيرة صفرا ملظظة، طلعتها
عمتي "رحمة"، على شان تهوى، وتاخذ شمس، عينيا برقت..
ووجهي ابتسم.. والفرحة مساعتنيش، ومرة واحدة نظيت على
المرتبة وبقيت أكل لأغاية ما شيعت.. كان طعمها لذيذ،

ماهلوش حل، عمتي "رحمة" لما لقت المرتبة كلها معضوضة،
عرفت إنه أنا، لأن مافيش حد في العائلة بياكل سفنج غيري،
"ياسين" ابن عمي بياكل نشارة خشب، و"نوفل" أخوه بياكل
الحصى الصغير المترب، بقوا بعد كده بيعملوا حسابهم هي
وعمتي "راضية"، كل ما يطلعوا مرتبة سفنج بره، لازم واحدة
فيهم تقعد تحرس، ويبدلوا الوردية مع بعض، لأغاية لما يسدخلوا
المرتبة آخر النهار، سالمة غائمة.

وكل صبح أطلب من ماما فلوس على شان أشتري مساحة
سبورة جديدة.. كانت تقول لي:

- إنت مش لسه شاربيها امبارح، أكلتها خلاص.

تديني الخمسة سنتي وتقول لي:

- لو أكلتها ثاني مش هديك.

أروح أنا بالخمسة سنتي عند عم "قروعة" أناوله وأقول له:

- عايز مساحة سبورة.

يقول لي:

- عايزها لون إيه؟

أفضل أبص للألوان الكثيرة الجميلة، وأفكر مع نفسي:

- تاكل إيه النهاردة يا علي؟... تاكل إيه؟...

المساحة اللي أكلتها امبارح، كان لوها أخضر، يبقى

النهارده آخذ اللون الوردي.

آخذ القرار وأشاور على اللون وأقول له:

- هاتلي اللون الوردي لو سمحت،

ولا أقول لك، هات الصفرا أحسن.

في التحضيري وأولى ابتدائي، كان عندنا في الفصل

مساحات سفنح مربعة كبيرة، كنت بحب أقوم أمسح السبورة

ولو ماحدث أخذ باله، كنت باخذها.

المدرسين عندهم كرتونة مليانة مسّاحات.. يا بختهم، لكن
في سنة ثانية ابتدائي غيروا النظام، جابوا مسّاحات جديدة،
حطة خشبة مربعة ملزوق عليها حطة موكيت، زعلت.. وكمان
بقي عندنا المديرة "للا فاطمة" بدل المدير "السي الشنتوف"،
عرفت إنه مات، وجاب مراته بداله.

زعلت.. على المسّاحات لأني مايجبش النوع الخشي.

"ياسين" ابن عمي ممكن، لكن هحتاج إنه يبردها ويعملها
نشارة خشب.

وجبنا الفيديو، رشيدة بنت "السي المسطاسي" جارنا، اللي
عايشة في بلجيكا، بعثت لنا فيديو من هناك، لكن الفيديو ده،
كان مختلف عن كل الفيديوهات، اللي كانت موجودة عند
الناس ساعتها، لأن الشرايط بتاعته كانت بتشتغل على
الوجهين.. زي شرايط الكاسيت، على شان تستوعب عدد
ساعات كثيرة، كانت مدة الشريط ٨ ساعات، وبكده كان
صعب نشوف أفلام تانية غير الأفلام اللي بعثتها لنا "رشيدة
المسطاسي" مع الفيديو. شفنا فيلم "الرسالة" وشفنا "عمر
المختار"، وحفظت معظم المشاهد ومعظم الحوار، وبقيت أمثل
للعيال في حتتنا المشاهد اللي مجبها، وحببت اسمي.. لأن اسم
الولد الصغير اللي بياخد نضارة "عمر المختار" لما بيتشبق في
آخر الفيلم، كان اسمه "علي"، على اسمي.

ولما كنا بنحارب ولاد الحنة اللي جنب حتنا، كنا بتتصف
زي المسلمين في فيلم الرسالة، وأخويا "سمير" شايل سيفه
الحشبي زي "حمزة"، بيقول لنا:

- استعدوا..الى الامام..تقدموا..

فنتطلق جري.. ونقول:

الله أكبر..الله أكبر..

وأخويا "سمير" يعمل لنا الموسيقى التصويرية لفيلم "الرسالة"
بيقه..كنا بنحس فعلا إننا هننتصر..

كان صعب إننا نشوف أفلام تانية.. لولا إن أخويا "خالد"
كان شاطر في الإلكترونيات، فكان يسروح عند أصحابه،
ويسجل لنا أفلام تانية من شرائط (ف ش س) وينقلها على
الشرائط بتاعتنا (جروندي ٢٠٠٠)، الظاهر إن الشركة اللي
عملت الفيديو ده، كانت بتأمل إنه ينتشر في سنة ٢٠٠٠،
ماكتش تعرف إنه هيقى في (س د) و(د ف د). وبكده شفت
أفلام "شارلي شابلن" وأفلام "لوريل وهاردي" وأفلام كتيرة
قوي.

أخويا "خالد"، زيادة على إنه كان شاطر في الإلكترونيات،
وغاوي يفتح كل التسجيلات والساعات اللي عندنا في البيت،

كان غاوي كمان يروح سينما، كان ياخديني معاه لسينما
"اسبانيول" اللي في قلب المدينة، نشوف أفلام الكاراتيه،
والأفلام الهندي، لكن أنا بنام منه، ضلمة السينما بتريحني،
وتخليني أنام، وفي آخر الفيلم، يولعوا النور، وأخويا "خالد"
يصحيني ويقول لي:

- لو نمت تاني، مش هجيبك معايا.

أوعده إن المرة الجايه مش هنام، وأقاوم النوم في المرة الجايه
على شان مايزعلش مني، لكن من غير فايده، بنام منه تاني.
حييت السينما من أخويا "خالد"، وعرفت إزاي أعدي الشارع
من عمي "رشيدة"، مسكتني من إيدي وقالت لي:

- نبص يمين ونبص شمال، ولما الشارع

يفضي، نعدي.

وعدينا الشارع مع بعض، ومن يومها بقيت أعدي الشارع
لوحدي، واتعلمت أكل من غير ما أعمل صوت من "رشيدة"
مراة خالي، مامة "رضا"، كنت بايت عندهم، وكنا بناكسل
فقال لي:

- لما نمضغ، نقفل بقنا، على شان

مانطلعش صوت، زي كده.

وورثني إزاي، ومن ساعتها بقيت أعمل زيها. وبكده،
بقيت كل ما أقابل واحدة اسمها "رشيدة"، أعرف إنها
هتكون.. يا إما زي "رشيدة المسطاسي" أو زي "رشيدة"
عمتي أو زي "رشيدة" مرأة خالي. وكل يوم بتعلم حاجات
جديدة.. و النهارده... فين وفين لما أتعلم حاجة جديدة.

ولو حبيت تتكلم عن الصرامة والحزم والشجاعة، يبقى
نتكلم عن جدي "دودوح"، كان يجي من بره يخط على الباب
بعصايته اللي مابتفرقوش خالص، ويكح كحة كبيرة ويقول:
- افتح الباب.

جدي "اهلالية" تقوم جارية على طول، ولو فيه حاجة في
إيديها، تسيبها، تفتح الباب بسرعة وتحب على إيده وتقول له:
- حمد الله على السلامة يا حاج.

توسع له ويدخل هو الأول وهي بعده، يسألها:

- خير، كله تمام؟

تجاوبه:

- الحمد لله، كله بخير، طول ما انت بخير يا حاج.

كانت سيرته في الحنة، ليها شنة ورنه، كانوا ينادوه سي
الحاج "دودوح"، كل الناس عاملة له حساب، وهو عامل
للناس ألف حساب وحساب، لو حد محتاج.. مايتأخرش عليه،
ولو فيه مشكلة في الحنة، يحلها، وكلمته تمشي على الكل، فيه
ناس بتسمع كلامه، على شان بتحترمه وتثق فيه، وفيه ناس
بتسمع كلامه، على شان بتخاف من العصاية اللي في إيديه،
ولو سمع أي حس في البيت يزقق ويقول:

- إيه الدوشة دي..؟

لو اثنين بيتخانقوا، يتصالحوا ساعتها، ولو حد بيتكلم،
يطلق، وجداتي وعماتي، وبابا وماما وإحنا كلنا، نحب على
إيده، بقول جداتي لأنه كان متجوز ثلاث ستات، "بما
اهلالية"، و"بما ميمونة"، و"بما رحمة".

لما يقعد على الأكل، الثلاثة كانوا يخدموا عليه، واحدة تجهز
الأكل، وواحدة تحط له الأكل، وواحدة عند راسه بتشوفه هو
عايز إيه، كنا أنا وولاد عمي.. "ياسين" و"نوفل"، نحب قوي
نقعد معاه في غرفة نومه.. يشم النشوق، ويدينا منه حنة صغيرة
نشمها ونقعد نعطس نعطس.. وهو يضحك ويتبسط، كنا
نحب نشوف ضحكته وهو بيهزر معانا، لأنه مايعملش كده
مع حد غيرنا، كان بيسألنا:

- مين فيكوا الحمار بتاعي؟

كنا نرفع إيدينا ونتخايق حواليه أنا و"ياسين" و"نوفل"
ونقول:

أنا.. أنا.. لأ أنا.....

فيضحك جامد، ولما يحب يستريح، يقول لحدتي "ميمونة"
ادي بيضة لكل واحد فيهم، تدي لكل واحد فينا بيضة
مسلوقة، من السلة المخطوطة تحت السرير، فنعرف إنه عايز
يريح، نخرج ونسييه ينام.

جدي "دودوح" كان نظره قليل، تقريبًا مايشوفش، يقولوا
إنه زمان عمل حادثة بعريته المرسيدس السوداء الكبيرة،
والزجاج دخل في عينيه، على شان كده كان بيركب مع بابا،
بيروح معاه ويجي معاه وبابا هو اللي يسوق به.

جدي هلالية كانت تنادي عليا وتقول لي:

- روح لعند الجامع، واستنى جدك لما يخلص الصلاة وجيه!
لكن لو سألك، قول له إنك كنت معدي بالصدفة على
شان ما يزعلش.

أفهم أنا، إنه مش عايز الناس تاخد بالها إنه ما يشفش،
أروح وأقف قصاد باب الجامع وأستناه، وهو خارج والعصاية
في إيديه، أروح له وأحب على إيده وأقول له:

- إزيك يا جدي

يملس على شعري ويقول لي:

- إنت بتعمل هنا إيه؟

أقول له زي ما قالت لي جدي "هلالية" بالظبط، ونحط
إيدينا في إيد بعض، ونروّح على البيت.

عماتي في البيت بقوا يضايقوني، بيقولوا لي إن فيه مولود
جديد جاي في السكة، هياخد مكاني، وإني مش هبقى دلوعة
ماما وبابا.

أمي فعلاً بطنها اتنفخت، وساعات بتتوجع على شان الولد
الجديد اللي جاي في السكة بيخبط برجليه، كنت ببقى عايز
أقول له:

- عيب يا اسمك إيه انت.!

لكن مايقاش عارف هو اسمه إيه!

أمي راحت المستشفى، وأبويا أخذني على شان أشوفها،
لقيتها نائمة على السرير وجنبها الولد الجديد، قالوا لي:

- ده، أخوك الصغير.

عمتي "رحمة" قالت، نسميه "عدنان"، وماما وافقت، وبابا جاب خروف، وجاب راجل كبير اسمه "الشريف"، كنت بشوفه في بيت جدي سلام.. أبو ماما، بيروّق الجنية ويسقي الورد، ويقص الشجر.

الشريف حط سكينه كبيرة على رقبة الخروف وقال:

- بسم الله، نسمي عدنان.

ودبح!!

إخواني ساعتها كلهم، "زكريا" و"سمير" و"طارق" و"رشدي" و"خالد"، كانوا مع جدي "دودوح" في بيته اللي في الريف، ماكنتش فضلت معانا غير أختي "الطاف"، اللي كانت زعلانة على شان عايزة بنت، أما أختي "سلوى" فكانت خلاص عايشة في هولندا مع جوزها "أحمد"، بقى لهم ييجي كده ستين.

لما إخواني رجعوا من الريف، أنا اللي خدمت ووريتهم "عدنان"، لأن أنا اللي شفته الأول، وأنا اللي أعرفه قبلهم، قلت لهم إنه اسمه "عدنان"، كان نائم في السرير الصغير بتاعي اللي على شكل قفص، لكن غيروا له المرتبة والملايات.

أول حاجة عملها "عدنان" لما جه، إنه أخذ السرير بتاعي،
بس أنا مازعلتش، لأنى بقيت بنام مع بابا وماما في السرير، ما
بينهم.

مرة دخلت على "عدنان" وهو نائم، لقيته بيضحك، رحت
لماما اللي كانت في المطبخ بتحضر الأكل، وقلت لها:
- عدنان بيضحك وهونائم.

قالت لي:

- يلعب مع الملايكة.

يعني مش مكفيه إنه ياخذ السرير بتاعي، وكمان يلعب مع
الملايكة، وأنا لأ!

حسيت إن "عدنان" محظوظ عني، ومن ساعتها بقيت أغير
منه...!!

ومات جدي "دودوح" ... ويومها.. بابا بكى كثير، كانت
أول مرة أشوف فيها بابا بيبكي، كانت جدتي "هلالية" بتقول
له:

- خلاص يا ابني.. إنت كده بتحرقه!!

ييص لها أبويا وهو بيشهق، ويقول لها:

- أهو يا أمي، أنا ماييكيش، لكن الدموع بتترل لوحدها.

يومها العائلة كلها بكّت، أنا و"ياسين" و"توفل" بس اللي
ما بكيناش، كنا مستغربين اللي بيحصل، البيت مليان
ذكر.. وفقهاء بيقروا القرآن، والمطبخ مليان فراخ ولحمة.

وحصل إضراب ٨٢، الشوارع بقت مليانة عساكر
برشاشات، والنافورة اللي بتطلع مياه بألوان اتحاوطت
بالدبابات، بقوا الناس يضربوا العساكر بالحجارة، والعساكر
تضرب برشاشات متعمدة بملح، وساعات رصاص بجذ، كان
ممنوع نبص من السطح، وكمان ممنوع نخرج في حتتنا، وبكده
مش هنعرف نروح المدرسة، كان باب البيت مفتوح على
طول، على شان لو حد من ولاد الحنة جري هربان من
العساكر، يعرف يزق الباب ويدخل على طول.

كان ممنوع على العساكر يدخلوا البيوت، زي ما ممنوع
علينا إحنا نخرج من البيوت، كان "بوعزة" اللي بيشتغل عندنا
على الموتوسكل أبو التلات عجالات، ساعات مايعرفش يروح
بيتهم، فيضطر إنه ييات عندنا، على شان ساكن جوا المدينة
العتيقة، والعساكر كانوا بيبقوا محاطين سور المدينة، على شان
يفصلوا السكان اللي جوا السور عن السكان اللي بره السور،
وساعات لما "بوعزة" يروح ومايجيش بكره، نبقى قلقانين عليه،

ولما يجي يحكي لنا إزاي دوّخ العساكر في الحوارى الضيقة، وعرف يقلت منهم جوا المدينة العتيقة، لأن العساكر مش من المدينة بتاعتنا، مايعرفوش حواريتها، كنت ببقى فخور، إن واحد بطل زي "بوعزة"، بيشتغل عندنا.

البيت كان دائماً مليان بولاد الجيران، وساعات بولاد غير الجيران، ناكل مع بعض، ونحكي، ويحكوا لنا عن اللي بيحصل بره، كانت البصارة بزيت الزيتون ساعتها، هسي الوجبة الأساسية، وكان طعمها بيبقى مالوش حل، مع ولاد الجيران.

سمعنا عن البنت الصغيرة اللي اتقتلت برصاصة طائشة، وهي بتلعب عند باب بيتهم، وسمعنا كمان عن الستات اللي كانت بتغلي زيت ومياه، وتدلقه على العساكر من فوق السطوح، وسط الحوارى العتيقة.

الجيران كانوا يسألوا على ولاد بعض، ويقلقوا على ولاد بعض، من اللي اتاخر ومن اللي ماجاش ومن اللي اتمسك ومين اللي اتضرب، وده بيات عند ده، الحقيقة إن مش كل حاجة حصلت إيام الإضراب، شوفتها، لكن الأخبار كانت بتوصلني كأني شوفتها بالظبط. ولما بزق من القعاد في بيتنا، أنزل تحت لبيت جدي "دودوح"، أدخل غرفته وما ألاقيهوش، لكن ألاقى العصاية بتاعته لسه زي ما هي محطوطة جنب السرير، أبص لها لكن ما ألسهاش.

وخلص الإضراب، والعساكر أقزموا ومشوا، وإحنا
رجعنا للمدرسة ثاني.

ويوم عن يوم، "عدنان" بيكبر، ويوم عن يوم مكانته بتزيد،
وياخذ حاجات كانت ممكن تكون بتاعتي، لو هو مجاش.

وابتدأت الحرب، "عدنان" بقى عايز أي حاجة يشوفها
عندي، حتى المعلقة اللي باكل بيها، حتى الكرسي اللي بقعد
عليه، وأمي تقول لي:

- ماعلش ده أخوك الصغير.

وابتدأت المعارك، "عدنان" هو اللي بيتدي بالضرب، وهو
اللي بيعيط، وهو اللي بيصرخ وينادي على بابا، وبابا هو اللي
بيكمل عليا.

لما كبرت وسافرت، بقى "عدنان" أكثر واحد بيوحشني،
اكتشفت إني بحبه، وإني ماكتتش عايزه يعرف، لأنه كان
يلعب مع الملائكة، وأنا لأ.

أختي "سلوى" كانت تحب تمسك إيدي وتبص لها وتقول
لي:

- إيدك جميلة قوي يا علي.

أبص أنا لإيدي.. وأقلبها كثير، عايز أشوف الجمال اللي فيها، لكن للأسف ما بشفهوش، مش عارف أخني "سلوى" كانت بتشوفه إزاي!

كانت هي زي ماما، وأنا زي ابنها، بنادي لها ماما سلوى.. بتحميني، وتلبسيني، وتأكليني، وبالليل بتحكي لي حواديت، يوم فرحها ما فارقتهاش، ويوم لما سافرت مع زوجها، على شان تعيش في هولندا، بكيت.. وهي كمان.. بكت، قالت لي:

- هرجع وأخذك تعيش معايا.

أخني "الطاف"، كان عندها استعداد إنها تعوض ماما سلوى، لكن أنا ما كنش عندي استعداد خالص، كانت تدخلني الحمام، وتحميني وتقول لي:

-أنا كمان لازم تنادينني بماما الطاف، شوف أنا بحميك، وبعيني بيك زي سلوى بالظبط.

أرشها بالمياه وأترفز عليها وأقول لها:

- إنت عايزة تبقي زي ماما سلوى،

ده بُعدك.

ساعتها تنترفز عليا وتضربني.

بعد جواز أخوتي "سلوى" وسفرها بسنة، ركبنا الطائرة أنا وماما وسافرنا لها على هولندا، فضلنا قاعدين في المطار مستنيين، لغاية لما جت هي وزوجها "أحمد"، كانت قاصة شعرها قصير، أنا زعلت، لأن شعرها كان جميل وهو طويل، ماما كمان قالت لها:

- ليه يا بنتي يا سلوى، خسارة شعرك اللي قصتيه، ده البنات كانوا بيتحاكوا عليه.

"أحمد" زوجها قال لها:

- أنا كمان ما كنتش موافق، بس ماحبتش، أكسر بخاطرها.

قعدت هي معانا، وراح "أحمد" على شان يخلص إجراءات المطار، لأنهم عايزين ضمان، وفعلاً خَلَصَ الإجراءات وطلعنا بره المطار، وركبنا عربية "أحمد"، عربية حمرة صغيرة، وفي الطريق "أحمد" وقف عند بترينة كانت فاضية، ونزل وحط البترين في العربية بنفسه، وحط الفلوس، وركب العربية ومشينا.

في تطوان وأنا مع بابا، لما يدخل بترينة، كان ينادي على حد شغلته يحط البترين، وكمان ياخذ الفلوس، هنا في هولندا الموضوع مختلف تماماً.

حتى الوجوه مختلفة، والألوان زاهية ومختلفة، الناس هنا
متبسمة على طول، وكمان بيتكلموا لغة غير لغتنا خالص،
أختي "سلوى" علمتني أقول (داخ منير)، يعني مع السلامة يا
سيدي، بقيت أقف في بلكونة البيت، وأشاور لجارنا في
البلكونة اللي قصادنا، وأقول له:

- داخ منير.

فيشاور لي هو كمان، لغاية لما أزهرقه، فيسيب البلكونة
ويدخل على جوا.

كنا نخرج كلنا نروح محلات هنا وهناك، ونشتري هدموم
ولعب، هولندا فيها حاجات كتيرة حلوة مش موجودة في
تطوان. كنا كل يومين تقريباً ناخذ خبز من البيت، ونروح أنا
وسلوى وماما على رجلينا، لجنينة الحيوانات اللي قريبة من
البيت، على شان نأكل البط اللي بيعوم في البركة، كانت أول
مرة أشوف فيها البط بيعوم في بركة على الحقيقة، كنت
بشوفهم قبل كده، في صور كتاب المدرسة بس، والصور اللي
بتلرق على السبورة. أختي "سلوى" كانت مصاحبة بطة
بعينها، وأكثر واحدة في البط تحب تأكلها، إنما أنا كنت
مصاحبهم كلهم، وبأكلهم قد بعض.

"أحمد" زوج اخوتي على طول يفسحني بعريته، ويشترى لي آيس كريم، طعمه أحلى من بتاع تطوان. لكن لما اشترى لي البطاطس المحمرة مع المايونيز، ماحتهاش، طعمها غريب، البطاطس اللي بتعملها ماما في البيت أحلى بكثير.

وهناك في هولندا، أخوتي "سلوى" عملت لي عيد الميلاد، كان أول مرة وآخر مرة أحتفل بعيد ميلادي، وكمان بي يوم غير عيد ميلادي نجد، قلت لأخوتي "سلوى":

- النهارده ماهواش يوم عيد ميلادي.

قالت لي:

- مش ضروري، أيام السنة كلها أعياد أهم حاجة إننا نخطط خمس شموعات في التورتة، ونجيب لك الهدايا اللي بتحبها، وبكده، هنكون بنحتفل بعيد ميلادك.

الساعة ستة مساءً، الناس كلها في بيوتها!! الشارع فاضي خالص، الناس في هولندا بيناموا بدري، ويصحووا بدري، اتعلمت أنا كمان أنام بدري زيهم، ولما رجعت تطوان رجعت أنام متأخر تاني، على شان في تطوان الناس بيناموا متأخرين.

لون السما في هولندا، كان على طول برتقالي محمر..

على الرغم من إن أخويا "عدنان" راح هولندا مرتين، مرة وهو في بطن ماما، ومرة وماما شيلاه، إلا إنه مش فاكر هولندا

دي خالص، وأنا اللي رحت مرة واحدة بس، فاكر فيها حاجات كتيرة.

لو حبيت تعرف معنى الحنية، يبقى لازم يكون لك جدة، زي جدتي "منانة"، ماما ماما، أو جدة زي جدتي "اهلالية" ماما بابا.

جدتي "منانة"، كانت دائماً لابسة أبيض في أبيض، وماسكة سبحة في إديها، كانت تحب تأكلني بالغضب، ولو ما كلتش ترعل، لما كنا نروح عندها أنا وماما، كانت تدخلنا المطبخ أنا و"عثمان" ابن خالتي "اهلالية"، ونملأ لنا كوبيتين حليب سخن وتقول لنا:

- يلا عايزة أشوف مين فيكم هيخلص، كوبايتي الأول.

أنا ماكنتش بحب الحليب السخن، ومع ذلك بخلص كوبايتي قبل "عثمان" ابن خالتي.

ولما تيجي "يما منانة" تزورنا في البيت، نجيب شنطة إيسدها مليانة حلويات وشوكولاتة، وتقول لي:

- انده على ولاد عمك، ياسين ونوفل!

أروح أنده لهم وأقول لهم:

- بما منانة، جات!!

كانوا يخرجوا من بيتهم يجروا على بيتنا، يبيقوا عارفين إنها جابت معها حاجات حلوة، كانت جدتي "منانة" توزع علينا الحلويات والشوكولاتة، وتبقى مبسوطة وفرحانة بينا، "ياسين" و"نوفل" بقوا يفرحوا بجدتي "منانة" لما تزورنا، أكثر ما يفرحوا بجدتهم "آمنة" لما تزورهم.

أما جدتي "هلالية"، فكانت بتحبنا كلنا، لكن بتحب أختي "الطاف" أكثر، و لما تبقى مسافرة للريف، تطلع عندنا الفجر، وتصحي "الطاف" تسلم عليها، وتديها خمسة درهم، أنا كنت ببقى شايف، بس عامل إني نائم، وفي مرة صحيت الصبح، أخذت الخمسة درهم من "الطاف" من غير ما تحس، ورحت على المدرسة، يومها اشتريت كل اللي نفسي فيه، لكن ما رحتش عند عم "قروعة"، لأنه مش هيصق إن أنا ممكن يبقى معي الخمسة درهم مرة واحدة، وأكد هيقول لبابا، على شان كده، اخترت محل ثاني، مليون حلويات سبعة، أكثر من محل عم "قروعة" بكثير.

ولما رجعت البيت، كانت "الطاف" ماخلتش حنة إلا ودورت فيها هي وماما، وأول ما شافتني طالع السلم وإيدي

مليانة حلويات، عرفت إن أنا اللي أخذت الخمسة درهم،
قالت لي:

- إنت اللي أخذت الخمسة درهم، بتاعتي،

اللي يما هلالية إدتها لي؟

قلت لها:

- نعم.. أبوه!! اشعني إنتي اللي يبقى معاكي خمسة

درهم، وأنا لا؟!

اتنفرزت عليا وحببت تضربيني، لكن أُمي ما سبتهاش، وقالت

لها:

- طالما اعترف.. يبقى.. خلاص.

شفت في عيني "الطاف" نظرة تحدي، وشفت في عيني

ماما نظرة احترام، ورجعت الباقي من الفلوس لـ "الطاف"

وكمان دوقتها من حلويات سبتة.

ونجحت.. وطلعت سنة رابعة ابتدائي، السنة رابعة دي تعتبر

سنة حاسمة في حياة كل طفل حر شريف، كان اسمها في

المغرب أيامها، "البروي" (يعني السنة اللي بتعدي فيها من

الابتدائي للإعدادي)، ناس كثيرة أعرفهم سقطوا في البروبي ده،
وخرجوا على الشغل عدل، النهارده، متجوزين ومخلفين
وفاتحين بيوت، ومعاهم عربية، وعایشين مائة فل، مش عارف
أنا إيه اللي دهولني على عيني، وخلاني نجحت!

في سنة رابعة دي.. قابلت الحب الحقيقي، بنت زي فلقة
القمر.. كان اسمها "موني".. كانت معايا في الفصل، حبتها من
أول نظرة، وعرفت إن حي لـ "لطيفة" مدرسة الفرنسية،
و"جيمي القوية"، وكمان "هيكارو" اللي كانت مع
"اغليندزر"... كان مجرد وهم، وإني أخيراً عرفت معنى الحب.

"موني" دي كانت رقيقة بشكل!! كانت قصة شعرها قصير
قوي، بنسبي القصة دي في المغرب، كوب كاغسون (يعني
قصة الولد)، وقليلين قوي البنات اللي بتليق عليهم القصة دي،
القمامير بس اللي زي "موني".

مشيت وراها لغاية ما عرفت هي ساكنة فين، وعرفت سكة
النحلة الكبيرة المليانة رطب، اللي كنت بشوفها من شسبايك
الفصل بتاعي..

وفي أيام الإجازات، بقيت أروح أقف عند النحلة، وأبص
على بيتهم، وتطلع هي البلكونة، تلاعب أخوها الصغير "عمر"،

كانت تبص لي، وتعمل نفسها مش شايفاني، كنت بقف قصاد
البلكونة أبص عليها، زي ماكنت بقعد قصاد شجرة التين
الخضرة الكبيرة زمان، أبص على البجيك بتاعي.

- يا هل ترى، هيجي يوم أبص على البلكونة، ومالكيش يا
"موني"؟ زي ما بصيت زمان على الشجرة الخضرة الكبيرة وما
لقتش البجيك بتاعي؟!

عمي "اشعيب" كان دائماً يناديني، الدكتور "علي"، أختي
"ألطاف" كتبها بقلم أزرق، تحت المرتبة الصغيرة اللي في
المطبخ، وكل يوم من أيام التخميل، كانت المرتبة دي لازم
تتقلب زيها زي أي حاجة في البيت، كان بيقى مكتوب
تحتها، الدكتور "علي الزيدي"، الظاهر إن كل العائلة، اتفقت
إني هبقى دكتور، أنا نفسي صدقت، لكن دكتور في إيه؟ مش
عارف...!! المهم، أقيس الضغط وأسمع نبض القلب.

وراحت أيام وجات أيام، والعمر جري، والنخلة الكبيرة
اللي مليانة رطب، النهارده اتشالت، وبنوا مكافها عمارة،
و"يحيى" ابن حارس المدرسة، بقى هو الحارس بدل أبوه.

وعم "قروعة" خسر وقفل المحل، وبقي كمسري في
الأتوبيسات، يقطع التذاكر، وبقي يصلي كل وقت بوقته،
ومواظب على صلاة الفجر في الجامع.

وعمي "اشعيب" تزوج وخلف خمس بنات زي القمر
وولدين، وساب القيادة، وساب جبل الحبيب وفتح مخبزة
كبيرة، وحج.

وحنان "دودوح" اتبني وناس جديدة جات سكنت فيه...
وجدتي "منانة"، تعبت قوي، مابقتش تقدر تمشي، لازم حد
يمسكها ويقومها ويقعدها..

قبل ما تموت بتلات أيام، شفتها في الحلم.. جيه عليا
بتمشي متعافية وبصحتها، وصلت لغاية عندي، وسلمت عليا
بعتها وابتسمت لي، وكملت الطريق، من غير ماتقول لي هي
رايحة فين، بصيت ورايا وشفتها وهي بتبعد بعيد خالص..

ولما صحيت من النوم، عرفت هي راحت فين.
و"موني" تزوجت، حد خطفها، زي ما خطفوا زمان
البجيك بتاعي..

وماتت جدتي "اهلالية".. والبيت الكبير فضي.. والنسافورة
اللي بتطلع مياه بألوان اتشالت، والوجوه بقت غير الوجوه،
غريبة عليا.

كل حاجة اتغيرت.. و"بوعزة" فضل زي ما هو، بيركب
الموتوسيكل أبو التلات عجالات، ويوزع قنينات الغاز في
الحواري الضيقة، اللي العربيات الكبيرة ماتقدرش تدخلها.

والنهارده لما بتيجي أختي "سلوى" من هولندا كل صيف،
بنقعد أنا وهي كثير مع بعض، نفتكر أيام زمان، مرة قلت لها:

- أنا حاسس إن بيتنا بقي صغير،

مع إنه زمان، كان كبير.

قالت لي:

- ده بس على شان كبيرنا.. زمان وإحنا

صغيرين، كانت كل حاجة كبيرة.

أختي "سلوى" لسه بتقدر تشوف حاجات، أنا مايعرفش
أشوفها.

واليوم، وأنا عمري ٣٢ سنة و٦ شهور و٧ أيام، فقدت
كل إحساسي بالاختلاف، بإني مختلف عن العيال اللي في
المدرسة، حاجة واحدة بس.. اللي فضلت محافظ عليها، إني لسه
بحب أبص للسما..

بالليل لما أشوف إن لون السما أسود، بقول ده بس على
شان بالليل، ولو لوها أحمر بخاف لأني بحس إنه مش لوها

الطبيعي، وبالنهار لما تكون السما مغممة، بقول إن لون الغيوم
بيحجب لونها الطبيعي، ويوم لما بتكون السما صافية ولونها
أزرق، بقول أيوه هو ده لون السما الطبيعي، أزرق..زى ما
علمونا في المدرسة بالظبط:

- لون السماء أزرق..وعلم بلادي جميل.

كان نفسي يختاروا اللون البرتقالي المحمر

القاهرة

٢٠٠٨/٠٧/١٩

